

DOMENIE XVIII «VIE PAL AN»

Antifone di jentrade Sal 69,2.6

Salvimi, Diu,
spessee a difindimi.
Tu sês tu il gno ripâr e la mê difese;
Signôr, no sta intardâti!

Colete

Vuarde, Signôr, i tiei fameis
e da la tô eterne protezion a di chei che te domandin;
a di chei che si tegnin in bon di vêti par lôr creadôr e paron
rinove lis robis che ti plasin e ten cont di ce che tu âs rinovât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Qo 1,2; 2,21-23

Ce i restial mo al om in dute la sô fadie?

Dal libri di Qoelet

Nuie di nuie, al à dit Qoelet, nuie di nuie: dut al è nuie.

Parcè che ind è un om che al à fadiât cun sapience, cun sience e cun impegn e al à di lassâ ce che al è so a di un altri che nol à fadiât un colp. Ancje chest al è un nuie e une disgracie grande.

Di fat ce i restial mo al om in dute la sô fadie e tal afan dal so cûr, che si è lambicât sot dal soreli?

Par ducj i dîs de sô vite, il so lavôr al è dolôr e aviliment. Il so cûr nol padine nancje di gnot. Ancje chest al è un nuie.

Peraule di Diu.

SALM RESPONSORIÂL dal Salm 94

R. Fâs che o scoltin la tô vôs, Signôr.

Vignît, batìn lis mans al Signôr,
fasìn fieste a la crete che nus pare;
presentinsi denant di lui ringraciantlu,
fasìn fieste cun cjantis di ligrie. R.

Vignît, butinsi a schene plete
denant dal Signôr che nus à creâts,
parcè che al è lui il nestri Diu,
e nô, il popul che lui al passone,
il trop de sô malghe. R.

Joi, se vuê la sô vôs o scoltassis:

«No stait a inrochîsi tal vuestri cûr come a Meribe,
come tal desert te dî di Masse,

là che mi àn tirât a ciment i vuestris paris,
a àn volût provâmi,

ancje se a vevin viodudis lis mêsvoris». R.

SECONDE LETURE Col 3,1-5.9-11

Cirît lis robis di là sù là che al è Crist.

De letare di san Pauli apuestul ai Colossês

Fradis, se o sês resurîts cun Crist, cirîf lis robis di là sù là che al è Crist, sentât a la diestre di Diu; pensait a lis robis di là sù e no a chês de tiere: di fat o sês muarts e la vuestre vite e je platade cun Crist in Diu. Cuant che il Crist, nestre vite, al comparissarà, alore ancje vualtris o comparissarês cun lui rivistûts di glorie.

Fasêt duncje murî lis parts che a son de tiere: fornicazion, sporcjetât, passion, golis disordenadis e chê gole di vê simpri di plui che e je rude idolatrie.

No stait a dîsi bausiis un cul altri, parcè che si sês disvistûts dal om vieri e dal so mût di operâ e si sês rivistûts dal gnûf, che si rinove, par une cognossince plui plene, sul stamp di chel che lu à creât.

In cheste condizion no je plui cuistion di Grêc e di Judeu, di circuncidût e di incircuncidût, di barbar, di Scite, di sclâf, di libar, ma di Crist, dut e in ducj.

Peraule di Diu.

CJANT AL VANZELI Mc 1,15

R. Aleluia, aleluia.

Il ream di Diu al è rivât:

convertîtsi e crodêt tal vanzeli.

R. Aleluia.

VANZELI Lc 12,13-21

A di cui larano lis ricjecis che tu âs ingrumadis?

Dal vanzeli seont Luche

In chê volte, un de fole i disè a Jesù: «Mestri, disii a gno fradi di spartî cun me la ereditât». Ma lui i rispuindè: «Amî, cui mi aial metût come judîc o mediatôr su la vuestre robe?». E ur disè: «Viodêt di tignîsi lontans di ogni sorte di avarizie, parcè che ancje se un al è une vore siôr, la sô vite no dipent de sô robe». Po ur contà une parabule: «Al jere un om siôr che al veve terens e chescj i vevin dât un bon racuelt. Lui al resonave dentri di se cussì: Cumò no ài plui dulà meti il gno racuelt; cemût aio di cumbinâ? E al disè: O cumbinarai cussì: o butarai jù i miei depuesits e int fararai sù di plui grancj, in mût di podê ingrumâ li dentri dut il gno forment e la mê robe. Po mi disarai: Bon! Cumò tu âs metude vie une buine scorte par un grumon di agns. Polse, anime mê; mangje, bêf e gjolt. Ma Diu i disè: Om cence sintiment! Juste usnot ti tocjarà di murî e a di cui larano lis ricjecis che tu âs ingrumadis? Cussì i capite a di chel che al ingrume ricjecis par sè e nol devente siôr denant di Diu». Peraule dal Signôr.

Su lis ufiertis

Santifiche, Signôr te tô bontât, chescj regâi e, daspò di vê acetade l'ufierte de vitime spirituâl,

fasinus diventâ ancje nô une ufierte eterne.

Par Crist nestri Signôr.

Antifone a la comunion Sap 16,20

Tu nus âs preparât, Signôr, un pan dal cîl,

un pan in grât di dânus ogni contentece

e di sodisfâ ogni gust.

Daspò de comunion

Compagne cu la tô continue protezion, Signôr,

chei che tu âs ristorât cul regâl dal cîl

e fâs diventâ degns de redenzion eterne

chei che no tu ti stufis mai di vuardâju.

Par Crist nestri Signôr.